

古事類苑

方技部十一

醫術二

醫家世襲

〔政事要略九五〕至要雜事又疾令醫云、醫生、按摩生、呪禁生、藥園生、先取藥部及世習謂藥部者、姓稱藥師者、即世習者、三世習醫業、相承為名家者也、

〔禮記曲禮下〕醫不三世不服其藥、

〔續日本紀二十〕天平寶字二年四月己巳己巳原係三月今改內藥司佑兼出雲國員外掾正六位上難波藥師奈良等一十一人言、奈良等遠祖德來、本高麗人、歸百濟國、昔泊瀨朝倉朝廷略雄詔百濟國訪求才人、爰以德來貢進聖朝、德來五世孫惠日、小治田朝廷御世古推被遣大唐、學得醫術、因號藥師、遂以為姓、

今愚闡子孫、不論男女、共蒙藥師之姓、竊恐名實錯亂、伏願改藥師字蒙難波連、許之、

〔續日本後紀六〕承和四年六月己未、右京人左京亮從五位上吉田宿禰書主、越中介從五位下同姓高世等、賜姓興世朝臣、始祖鹽乘津大倭人也、後順國命往居三巴汝地、其地遂隸百濟、鹽乘津八世孫達率吉大尙、其弟少尙等、有懷土心、相尋來朝、世傳醫術、兼通文藝、子孫家奈良京田村里、仍元賜姓吉田連、

〔文德實錄二〕嘉祥三年十一月己卯、從四位下治部大輔興世朝臣書主卒、書主右京人也、本姓吉田連、其先出自百濟、祖正五位上圖書頭兼內藥正相摸介吉田連宜、父內藥正正五位下右麻呂、並為侍醫、累代供奉、